



## Jadual Pembacaan Khutbah Jumaat Siri 6/2023 (Bulan Jun Tahun 2023)

تاریخ	تاجوق	ب
2 Jun 2023M/ 13 Zulkaedah 1444H	<b>Santuni Tetangga: Membawa Ke Syurga</b>	1.
9 Jun 2023M/ 20 Zulkaedah 1444H	Sempena MTHQK 2023 <b>Al-Quran Sahabat Sejati Teman Sehidup Semati</b>	2.
16 Jun 2023M/ 27 Zulkaedah 1444H	Sempena MTHQK 2023 <b>Kenali dan Kenalkan Al-Quran: Manual Kehidupan</b>	3.
23 Jun 2023M/ 4 Zulhijjah 1444H	<b>Berkorban Demi Cinta</b>	4.
30 Jun 2023M/ 11 Zulhijjah 1444H	<b>Hikmah Di Sebalik Ibadah Haji</b>	5.
<b>Khutbah Kedua</b>		

دببایاء:



زكاة فولاو فینغ

دتریبیتکن:



جابتن حال إحوال اگام اسلام فولاو فینغ

**Jawatankuasa**  
**Panel Semakan Teks Khutbah**  
**Negeri Pulau Pinang**

---

- 1. SS Dato' Seri Dr. Haji Wan Salim bin Wan Mohd Noor (Pengerusi)**  
Mufti Kerajaan Negeri Pulau Pinang
  
- 2. Y.Bhg Dato' Rosli bin Othman**  
Ahli Jawatankuasa Fatwa Negeri Pulau Pinang
  
- 3. Prof. Madya Dr. Atikullah bin Abdullah**  
Pensyarah, Pusat Pengajian Ilmu Kemanusiaan,  
Universiti Sains Malaysia
  
- 4. Ustaz Ahmad bin Hashim**  
Ketua Pusat Pengajian Tahfiz Al-Quran,  
Kolej Islam Teknologi Antarabangsa Pulau Pinang (KITAB)
  
- 5. Ustazah Rohayati binti Daud**  
Mantan Penyelaras Program Intervensi Kaunseling,  
Universiti Sains Malaysia
  
- 6. Ustaz Mohd Salmi bin Shaimi**  
Ahli Jawatankuasa Fatwa Negeri Pulau Pinang
  
- 7. Ustaz Subki bin Mohamed**  
Mantan Pensyarah, IPG Kampus Tuanku Bainun
  
- 8. Ustaz Mohd Hanif bin Omar @ Wahab (Setiausaha)**  
Ketua Penolong Pengarah, Bahagian Dakwah  
Jabatan Hal Ehwal Agama Islam Pulau Pinang (JHEAIPP)





## Berkorban Demi Cinta

23 Jun 2023M/ 4 Zulhijjah 1444H

الْحَمْدُ لِلَّهِ الَّذِي جَعَلَ حُبَّهُ أَشْرَفَ الْمَكَاسِبِ، وَأَعْظَمَ الْمَوَاهِبِ، وَأَشْكُرُهُ عَلَى نِعْمَةِ الْمَطَاعِمِ وَالْمَشَارِبِ.

وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ الْمُنَزَّهَ عَنِ النَّقَائِصِ وَالْمَعَايِبِ،  
وَأَشْهَدُ أَنَّ سَيِّدَنَا وَنَبِيَّنَا مُحَمَّدًا عَبْدَهُ وَرَسُولَهُ الدَّاعِيَ إِلَى الْهُدَى وَالطَّهَارَةِ مِنَ  
الْمَثَالِبِ.

صَلَّى اللَّهُ وَسَلَّم عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ الَّذِينَ أَحَبَّهُمُ اللَّهُ بِالْإِبْتِلَاءِ  
وَالْمَصَائِبِ.

أَمَّا بَعْدُ، فَأَوْصِيكُمْ وَنَفْسِي بِتَقْوَى اللَّهِ، فَهِيَ سَبِيلُ النِّجَاةِ وَالْفَلَاحِ لِعِبَادِهِ  
الْمُؤْمِنِينَ.

### MUSLIMIN RAHIMAKUMULLAH,

Khatib ingin menyeru seluruh umat mukminin untuk sama-sama kita meningkatkan nilai ketakwaan dengan mentaati segala titah perintah Allah **سُبْحَانَهُ وَتَعَالَى**, meninggalkan segala larangan-Nya dan bermujahadah untuk mencintai segala sunnah Rasul-Nya.

Marilah kita tumpukan perhatian kepada khutbah yang akan disampaikan. Cukup-cukuplah dengan perbuatan-perbuatan yang merosakkan ganjaran Jumaat kita. Usah bercakap-cakap, simpanlah telefon bimbit untuk seketika dan tidak menggerakkan tabung Jumaat.



Semoga khutbah yang disampaikan dapat diambil panduan dan pesanannya. Izinkan mimbar untuk membawa hati dan jiwa sekalian yang hadir mentadabbur sebuah khutbah yang bertajuk: **“Berkorban Demi Cinta.”**

## **SAUDARA-SAUDARAKU YANG DIKASIHI ALLAH,**

Tertegaknya agama di atas dasar cinta, perlu disusuli pengorbanan yang sangat tinggi serta maharnya pula keringat darah dan tangisan. Lambang pengorbanan demi cinta ini dapat difahami daripada kisah Nabi Adam عَلَيْهِ السَّلَام mengorbankan rindu dan cinta Baginda terhadap keindahan dan kenikmatan syurga Allah. Cinta Adam dan Hawa tercipta di syurga namun terpisah sementara dan akhirnya kembali bertaut semula di dunia.

Demi cinta, Nabi Allah Ibrahim عَلَيْهِ السَّلَام sanggup berpisah dengan anak dan isteri tercinta yang ditinggalkan di bumi Makkah yang tandus dan gersang kerana mematuhi perintah Allah, sebagai bukti kecintaan kepada pencipta melebihi segalanya.

Atas perintah Allah, Nabi Ibrahim membuktikan keikhlasan dan kecintaan yang tidak berbelah bahagi pada Tuhannya biarpun ia melibatkan nyawa ahli keluarga yang tercinta. Layaklah Baginda mendapat gelaran *Khalilullah* (sang kekasih Allah).

Setelah jauh berkelana ribuan kilometer jaraknya, meredah panas gurun sahara namun siapa sangka berkat kesabaran, kecekalan dan pengorbanan luar biasa Baginda, Allah menghadiahkan anugerah tertinggi buat seluruh umat iaitulah tapak terbinanya Kaabah dan Mekah

yang kita kenali hari ini. Allah **سُبْحَانَهُ وَتَعَالَى** berfirman dalam surah Ibrahim ayat 37:

رَبَّنَا إِنِّي أَسْكَنْتُ مِنْ ذُرِّيَّتِي بِوَادٍ غَيْرِ ذِي زَرْعٍ عِنْدَ بَيْتِكَ الْمُحَرَّمِ رَبَّنَا لِيُقِيمُوا الصَّلَاةَ  
فَأَجْعَلْ أَرْضَهُمْ مِنَ النَّاسِ تَهْوِي إِلَيْهِمْ وَأَرْزُقْهُمْ مِنَ الثَّمَرَاتِ لَعَلَّهُمْ يَشْكُرُونَ ﴿٣٧﴾

Maksudnya: *“Wahai Tuhan kami, sesungguhnya aku telah memanfaatkan sebahagian keturunanku di lembah yang tidak mempunyai tanam-tanaman di sisi Baitullah-Mu yang mulia, ya Tuhan (yang demikian itu) agar mereka melaksanakan solat, maka jadikanlah hati sebahagian manusia cenderung kepada mereka dan berilah mereka rezeki dari buah-buahan, mudah-mudahan mereka bersyukur.”*

Isterinya pula redha dalam cinta untuk membesarkan anak sebatang kara. Berbekalkan keyakinan yang tinggi kepada Allah, siapa sangka rencana Allah **سُبْحَانَهُ وَتَعَالَى** mengatasi segala-galanya. Air Zamzam menjadi saksi bukti pengorbanan ulung Hajar dan anaknya.

Apabila bertembung antara kepentingan duniawi dan tuntutan ukhrawi, bulatkan tekad untuk meletakkan kepentingan agama dan syariat melebihi keinginan dunia yang sementara. Berbekalkan iktikad yang kukuh dan iman yang ampuh, kita akan berjaya melepaskan dunia dari ikatan hati kerana pengorbanan itu adalah membebaskan apa yang kita sayang. Allah sesekali tidak akan mensia-siakan pengorbanan dan usaha hambanya dalam memartabatkan agamanya.

## **SIDANG JUMAAT YANG DIMULIAKAN,**



Kisah pengorbanan cinta kelas tertinggi ini tidak hanya terhenti di situ. Dari bumi penuh sejarah itulah, lahirnya seorang Nabi terulung, Rasulullah ﷺ. Baginda Nabi Muhammad terus mewarisi kecekalan dan keluarbiasaan Nabi Ibrahim عَلَيْهِ السَّلَامُ yang setia berkorban demi umat biarpun jasad pernah terluka dan tercedera. Demi cinta juga, Baginda meninggalkan bumi Mekah setelah 13 tahun lamanya meneruskan misi dakwah tanpa kenal erti penat.

Berat mata memandang, berat lagi rindu yang bertandang. Baginda menghimpun seluruh kekuatan mental dan spiritual untuk melepaskan seketika tanah tumpah darahnya biarpun jejak langkah hijrah Baginda ke Madinah bersaksikan air mata dan keringat. Hanya Allah sahaja yang tahu apa yang dirasai oleh Baginda saat melangkah pergi meninggalkan tanah kelahiran Baginda.

Siapa sangka hasil pengorbanan Baginda, Allah ﷻ menganugerahkan Madinah Al-Munawwarah, kota cahaya penuh cinta yang sentiasa memukau jiwa sesiapa pun jua yang bertamu di Madinah. Madinah adalah anugerah dari munajat keimanan dan pengorbanan suci Baginda. Tanpa cinta, keimanan hanya sekadar nama tanpa kemanisan. Sedangkan salah satu daripada tanda-tanda kemanisan iman ialah sepertimana sabda Rasulullah ﷺ:

أَنْ يَكُونَ اللَّهُ وَرَسُولُهُ أَحَبَّ إِلَيْكَ مِمَّا سِوَاهُمَا

Maksudnya: *“Apabila Allah dan Rasul-Nya lebih kamu cintai daripada selain kedua-Nya.”* ﴿Hadis Riwayat Al Bukhari﴾



Bertitik tolak dari pengorbanan para anbiyak, Islam selamat sampai ke dalam genggamannya kita. Para ulamak dan pendakwah terus menyebarkan Islam ke segenap pelusuk dunia dari generasi ke generasi. Biarpun mereka pernah dipijak dan dihenyak namun Islam tetap diperjuangkan. Betapa dalamnya cinta mereka hingga sanggup menggadai nyawa demi kelangsungan agama.

Tidur mereka tak pernah nyenyak. Makan tak pernah kenyang. Pakaian hanya sekadar sahaja. Rehat mereka tak pernah cukup. Itulah nilai sebuah pengorbanan. Justeru, di manakah nilai pengorbanan kita untuk agama? Pernahkan kita berdarah dan terluka kerana memartabatkan agama? Tepuk dada, biar iman berbicara.

### **SIDANG MUKMIN RAHIMAKUMULLAH,**

Jika manusia itu menyayangi sesuatu atau seseorang, dia akan berikan perhatian, namun apabila Allah **سُبْحَانَهُ وَتَعَالَى** mencintai, maka dia akan memberikan ujian. Qudwah yang ditinggalkan oleh generasi terdahulu adalah untuk diteladani dan dicontohi.

Ujian mereka bukannya satu, namun muncul bertalu-talu. Agama ini bukan percuma, maharnya ialah pengorbanan dan kecintaan. Para sahabat **رَضِيَ اللَّهُ عَنْهُمْ أَجْمَعِينَ** begitu komited menjadi barisan hadapan Nabi lantas membentuk barisan pelindung di saat musuh datang menyerang dari segenap penjuru.

Tekad dalam hati mereka hanya satu, selagi hayat dikandung badan tidak akan kami biarkan jasad Nabi terhiris dan terguris walau sedikit. Mereka mengeluarkan dan memanfaatkan segala apa yang ada

hanya untuk mempertahankan agama, bukan hanya sibuk merebut takhta dan menghitung aset harta.

Cinta itu harus dizahirkan melalui perbuatan bukan hanya perkataan. Dengan cinta, jalan yang sempit nampak seakan luas. Tanpa cinta, hidup terasa sempit. Orang yang di dalam hatinya ada cinta, yang jauh terasa dekat, yang lama terasa cepat dan yang berat terasa ringan. Begitulah tarbiah Allah **سُبْحَانَهُ وَتَعَالَى** buat para *anbiya'* dan solihin.

Rasulullah **صَلَّى اللَّهُ عَلَيْهِ وَسَلَّمَ** pernah bersabda dengan maksud:

*“Seseorang akan menjadi hamba kepada apa-apa yang dicintainya.”*

﴿Hadis Riwayat Al Bukhari﴾

Justeru, manusia yang dihinggap oleh penyakit hubbudunia ( **حُبُّ** الدُّنْيَا ) iaitu cintakan dunia akan merasa berat untuk berkorban pada jalan agama. Sebaliknya, ia sanggup menghambakan diri hingga terkorban solatnya malah ada yang tergadai maruah agamanya.

## **SIDANG JEMAAH YANG DIMULIAKAN,**

Kisah-kisah pengorbanan yang telah disampaikan ini bukanlah hanya sekadar untuk diperdengarkan namun perlu diterjemahkan di dalam kehidupan seharian selaku hamba Allah. Antara insan yang paling banyak berkorban dalam hidup ialah ayah. Sebatang jasad yang seringkali bermandi peluh demi sesuap nasi buat anak-anak dan ahli keluarganya. Ayah umpama wira yang tak didendang. Kita tidak akan pernah melihat dan merasai basahnya air mata ayah kerana ayah akan menyembunyikan lelahnya di atas sejadah di malam hari saat engkau

telah pun berangkat ke alam mimpi. Justeru, yang masih mempunyai ayah, pandanglah wajah ayah sebagai seorang perwira dengan penuh cinta.

## **MUKMININ RAHIMAKUMULLAH,**

Mengakhiri khutbah pada hari ini, khatib ingin mengajak dan menyeru sidang jemaah yang dimuliakan Allah untuk sama-sama kita merenung ke dalam diri untuk memahami nilai pengorbanan yang sewajarnya kita warisi sebagai umat Nabi Muhammad ﷺ:

**Pertama:** Susah payah generasi dahulu adalah demi kesenangan dan keselesaan kita pada hari ini. Nyenyaknya tidur kita hari ini adalah dari kesusahan mereka bersengkang mata.

**Kedua:** Cinta itu perlu disemai dan ditanam agar membuah hasil berguna buat agama, bangsa dan negara.

**Ketiga:** Di hujung setiap episod duka dan pengorbanan, pasti ada kebaikan yang menanti. Di hujung setiap usaha, pasti ada hasil yang menunggu cepat atau lambat.

Semoga kita sentiasa berada dalam suluhan wahyu dan dikurniakan kekuatan serta istiqamah di jalan-Nya untuk berkorban demi cinta.

Firman Allah **سُبْحَانَهُ وَتَعَالَى** dalam surah At Taubah ayat 20:

الَّذِينَ ءَامَنُوا وَهَاجَرُوا وَجَاهَدُوا فِي سَبِيلِ اللَّهِ بِأَمْوَالِهِمْ وَأَنْفُسِهِمْ أَكْبَرُ دَرَجَةً عِنْدَ اللَّهِ

وَأُولَئِكَ هُمُ الْفَائِزُونَ ﴿٥٠﴾

Maksudnya: “Orang-orang yang beriman dan berhijrah serta berjihad di jalan Allah, dengan harta dan jiwa mereka, adalah lebih tinggi darjatnya di sisi Allah. Mereka itulah orang-orang yang memperoleh kemenangan.”

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِهَدْيِ سَيِّدِ الْمُرْسَلِينَ، أَقُولُ  
مَا سَمِعْتُمْ، وَأَسْتَغْفِرُ اللَّهَ لِي وَلَكُمْ، وَلِسَائِرِ الْمُسْلِمِينَ مِنْ كُلِّ ذَنْبٍ، فَاسْتَغْفِرُوهُ،  
إِنَّهُ هُوَ الْغَفُورُ الرَّحِيمُ.



## خطبة كدوا بولن جون

2023M/ 1444H

الْحَمْدُ لِلَّهِ عَلَىٰ آيَاتِهِ وَإِحْسَانِهِ، وَالشُّكْرُ لَهُ عَلَىٰ تَوْفِيقِهِ وَامْتِنَانِهِ،  
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ تَعْظِيمًا لِشَانِهِ،  
وَأَشْهَدُ أَنَّ مُحَمَّدًا عَبْدُهُ وَرَسُولُهُ دَاعِيًا إِلَىٰ رِضْوَانِهِ.  
صَلَّى اللَّهُ وَسَلَّم عَلَىٰ سَيِّدِنَا مُحَمَّدٍ وَعَلَىٰ آلِهِ وَصَحْبِهِ، عَدَدَ خَلْقِهِ وَرِضَا نَفْسِهِ،  
وَزِنَةَ عَرْشِهِ وَمِدَادَ كَلِمَاتِهِ.  
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ تَعَالَى رَبَّكُمْ حَقَّ تَقَاتِهِ، وَاعْمَلُوا بِطَاعَتِهِ  
وَمَرْضَاتِهِ، ثُمَّ اْعَلَمُوا أَنَّ اللَّهَ سُبْحَانَهُ وَتَعَالَى أَمْرُكُمْ بِأَمْرٍ بَدَأَ فِيهِ بِنَفْسِهِ؛ فَقَالَ عَلِيمًا  
حَكِيمًا:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا

﴿٥٦﴾ [الأحزاب: 56]

اللَّهُمَّ صَلِّ وَسَلِّمْ عَلَىٰ عَبْدِكَ وَرَسُولِكَ مُحَمَّدِ بْنِ الْبَشِيرِ النَّذِيرِ، وَالسَّرَاجِ الْمُنِيرِ،  
وَارْضَ اللَّهُمَّ عَنِ آلِهِ وَصَحَابَتِهِ أَجْمَعِينَ، وَعَنِ التَّابِعِينَ، وَمَنْ تَبِعَهُمْ بِإِحْسَانٍ  
إِلَىٰ يَوْمِ الدِّينِ، وَعَنَّا مَعَهُمْ بِعَفْوِكَ وَكَرَمِكَ وَإِحْسَانِكَ يَا أَرْحَمَ الرَّاحِمِينَ.  
اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ  
وَالْأَمْوَاتِ،

اللَّهُمَّ آمِنَّا فِي أَوْطَانِنَا، وَأَصْلِحْ وَاحْفَظْ أَيْمَتَنَا وَعُلَمَاءَنَا وَوُزَرَءَنَا وَوُلَاةَ أُمُورِنَا.  
اللَّهُمَّ وَقِّفْهُمْ لِمَا فِيهِ عِزُّ دِينِكَ وَنَصْرُ شَرِيعَتِكَ، اللَّهُمَّ اجْعَلْهُمْ هُدَاةً مُهْتَدِينَ  
صَالِحِينَ مُصْلِحِينَ وَاشْمَلِ اللَّهُمَّ بِعِنَايَتِكَ وَتَوْفِيقِكَ عَلَىٰ صَاحِبِ الْجَلَالَةِ،



Kebawah Duli Yang Maha Mulia Seri Paduka Baginda Yang di-Pertuan Agong, Al-Sultan Abdullah Ri'ayatuddin Al-Mustafa Billah Shah Ibni Almarhum Sultan Haji Ahmad Shah Al-Musta'in Billah dan Kebawah Duli Yang Maha Mulia Seri Paduka Baginda Raja Permaisuri Agong, Tunku Azizah Aminah Maimunah Iskandariah Binti Almarhum Al-Mutawakkil Alallah Sultan Iskandar Al-Haj;

وَكَذَلِكَ صَاحِبِ الْفَخَامَةِ،

Tuan Yang Terutama, Tun Dato' Seri Utama Ahmad Fuzi Bin Haji Abdul Razak, Yang di-Pertua Negeri Pulau Pinang.

اللَّهُمَّ ادْفَعْ عَنَّا الْبَلَاءَ وَالْوَبَاءَ وَالْغَلَاءَ وَالرِّيَاءَ، وَالرَّبَا وَالرُّنَا وَالزَّلَازِلَ وَالْمِحْنَ وَسُوءَ الْفِتَنِ مَا ظَهَرَ مِنْهَا وَمَا بَطَنَ عَن بَلَدِنَا هَذَا خَاصَّةً، وَعَنْ سَائِرِ بِلَادِ الْمُسْلِمِينَ عَامَّةً يَا رَبَّ الْعَالَمِينَ.

اللَّهُمَّ إِنَّا نَعُوذُ بِكَ مِنَ الْبَرَصِ وَالْجُنُونِ وَالْجُدَامِ وَمِنْ سَيِّئِ الْأَسْقَامِ، يَا أَرْحَمَ الرَّاحِمِينَ.

*Ya Allah! Dengan sifat-Mu yang Maha Pemurah dan Maha Mendengar, jadikanlah kami dan keturunan kami orang-orang yang istiqamah mendirikan solat secara berjemaah serta mengeluarkan zakat dan melaksanakan waqaf melalui agensi milik penuh Majlis Agama Islam Negeri Pulau Pinang (MAINPP) iaitu Zakat Pulau Pinang (ZPP) dan Wakaf Pulau Pinang (WPP). Semoga sumbangan 10% daripada hasil kutipan Tabung Jumaat mingguan dari setiap masjid kepada Tabung Wakaf yang telah ditubuhkan, menjadi saham yang berkekalan manfaatnya, di dunia dan akhirat.*

*Ya Allah! Berilah petunjuk-Mu kepada kami dan pemimpin-pemimpin kami untuk memberikan khidmat bakti yang terbaik kepada agama, bangsa dan negara. Ya Allah! Kuatkan iman kami agar dapat*



menghindari perbuatan khianat, salah guna kuasa dan harta, memberi atau menerima rasuah dan segala perbuatan durjana yang merosakkan kepentingan agama, masyarakat dan negara.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.

عِبَادَ اللَّهِ! إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي الْقُرْبَىٰ وَيَنْهَىٰ عَنِ الْفَحْشَاءِ  
وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ ﴿١٩﴾ فَادْكُرُوا اللَّهَ الْجَلِيلَ يَذْكُرْكُمْ،  
وَاشْكُرُوهُ عَلَىٰ نِعَمِهِ يَزِدْكُمْ، وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ ﴿٢٥﴾